

Archivo Nacional Aruba ta informa

Entrega di material di scol “Aruba den temp’i guerra”

ORANJESTAD - Recientemente a tuma luga na Archivo Nacional e entregamento di un pakete di material pa scol tocante “Aruba den temp’i guerra”.

Ta trata di un pakete cu ta consisti di un buki pa alumno, un guia pa maestro, 4 DVD, un corant cu informacion

di Segunda Guerra Mundial relaciona cu Aruba, un buki conmemorativo di exposicion “Aruba den temp’i guerra” teni na aña 2010 y un poster di Derecho di Mucha.

Na 2009 Archivo Nacional cu sosten financiero pa medio di Fundacion Amigonan di Archivo, a start cu un proyecto



Entregamento di buki di Archivo Nacional Aruba.



bastante ambicioso, esta di inventarisa materialnan na Aruba di loke ta concerni e topico di Segunda Guerra na Aruba, entrevista schutternan cu a participa na defensa di Aruba durante di e periodo ey pa asina presenta nan como parti di nos herencia den un banco di data di Reino, un exposicion como resultado di e trabounan investigativo haci, y documentacion di esakinan den un buki y naturalmente material di educacion no solamente tocante di Segunda Guerra, sino tambe di tur cos cu tin di haber cu guerra en general, discriminacion, conflicto etc.

E prome y di dos fase di e proyecto aki a wordo ehecuta dor Edric Croes, historiador na Archivo Nacional. Despues di a haci un inventarisaion di materialnan cu ta na Archivo Nacional a bay

over den e di dos fase pa entrevista diferente schutternan. E filmacion a sosode cu Roos Productions, mientras cu e financiamiento di e prome dos fase nan aki tabata danki na Prins Bernhard Cultuurfonds, UNOCA y e proyecto di ministerio Hulandes di VWS, esta Programma Erfgoed van de Oorlog.

Danki na e ultimo programa aki e entrevistanan aki a bira parti di herencia di Reino Hulandes riba e topico di Segunda Guerra Mundial.

E di tres fase ta un proyecto tabata ensera e exposicion cu a tuma luga na 2010 y cu a keda coordina pa Edric Croes y Rosa Arends y cu sosten completo di e personal di Archivo Nacional. E di tres fase tabata posibel danki na e sosten financiero di Mondriaan Stichting, Prins Bernhard Cul-

tuurfonds, Samenwerkende Fondsen (SKAN) y Gobierno di Aruba. E ultimo fase cual ta di e publicacion, tabata na e encargo di Raymond Hernandez cu asistencia di Rosa Arends pa compilacion di e buki conmemorativo di e exposicion. E buki aki a wordo financia danki na UNESCO. Pa loko ta e parti di e material educativo, esta e corant, e buki pa alumno, e guia pa maestro y e 4 DVD-nan, tabata na encargo di Rosa Arends cu desaroya e curiculo pa scol.

Esakinan a keda parcialmente financia pa Mondriaan Stichting, Unoca y SKAN di Hulanda, mientras cu e DVD-nan a wordo ehecuta tambe cu propio fondonan di Fundacion ADA. E parti di material aki ta basa riba investigacion di Edric Croes y Rosa Arends, mientras cu Aurita Arends a haci e coreccion di papiamento. E DVD-nan ta complementa e material skirbi, pa asina e trece e experiencia un tiki mas cerca e alumnonan.

Un danki special ta bay na tur e personanan cu contribui cu e bunita proyecto aki, mescos tambe na Maybellyne Arends-Croes y su alumnonan cu a duna cu a aporta na e DVDnan, mescos Tele-Aruba pa su cooperacion pa por a reedita un documentario di Boy Ecury y Aruba bou atake, Guenter y Walter Bosse y Hildegard Pang Hintz pa e video tocante Campo di internado na Boneiro, John Freddy Montoya y Teatro Experimental Contemporaneo, Asociacion Camarada y Schutternan pa e video “Aruba den temp’i guerra”.

A haci entrega na diferente instancianan, manera na Biblioteca Nacional, schutternan, y simbolicamente na Scol Kudawecha. Den e dianan aki Archivo Nacional y Fundacion ADA lo ta repartiendo e pakete escolar aki na tur scolnan basico. E intencion di material ta pa uza den e 5 y 6 klas, y tambe por wordo uza den di 1 y 2 klas di school avansa.

Archivo Nacional y Fundacion Amigonan di Archivo ta spera cu e material aki lo ta duna un aporte positivo na enseñanza y conocimiento di nos historia, particularmente pa loko ta trata un episodio tristo den historia mundial. □